

魯  
之  
春  
秋

傳第八

魯之春秋卷十九

海鹽李聿求學

忠義

沈履祥

吳從魯等

傅

巖子齡發等

高岱

子朗等

李

桐子文景等

汪涵

茅瀚

倪懋熹

朱養時

鄭遵儉等

傅日炯方

炯等

趙景麟

葉上高

自古忠臣義士爲國捐軀史傳備極表章而行之者實寡若浙東若舟山諸臣視死如歸而不之悔自非耿介

苦心之人鬱快激氣之士何能若斯之烈也作忠義傳  
沈履祥字其旋號視菴慈溪人大學士宸荃從兄崇禎  
十年成進士授侯官知縣以循良調甌寧福王時行取  
入都上治平要務又上責成疏南都破歸魯王監國召  
補江西道御史時阮大鍼竄方國安營嗾國安糾東林  
遺孽履祥預焉辭去不許進太僕少卿兼故官奉命督  
餉清察糧務事履祥轉餉台州而江上師潰

大兵下台州履祥走海門或曰盍避乎履祥曰死吾分  
也且按冊索捕吾父若何遂被執

大兵譟擣之撫聞履祥謝曰文信國有言吾不能捍父

母而教人叛父母乎然則且薙髮曰頭可斷髮不可薙也引頸就刃而死其兄穀祥求屍不獲越二月閒止逆旅市飲者遽詫涕曰督餉官員忠臣亟詢之且言就刃狀跡得之履祥面如生其時先後殉節者山陰吳從魯沈綵會稽馬權奇上虞徐復儀餘姚汪登瑞臨海翁明英江山鄒璘金華潘大成葉向榮東陽杜學伸分水徐進志云從魯字金堂萬厯四十四年進士授兵部主事累遷四川右參政歸監國召補通政使自縊死綵字素先崇禎六年舉鄉試監國授御史赴水死權奇字巽倩崇禎四年進士授工部主事司琉璃廠關誣其有私事

白乃歸監國駐紹興破家輸餉城破死於亂兵復儀字  
漢官號雪潭崇禎十六年進士授行人福王時遷刑部  
員外郎命典試雲南監國召改編脩聞變哭奔蹲山頭  
夜不抵舍父恐其爲豺虎所食遣人尋招不獲竟投空  
谷死登瑞字熙字申武舉歷大同總兵都督僉事值魏  
闖亂政告歸聞江上師潰絕食死明英字坦人崇禎九  
年舉於鄉監國授主事進御史被執不屈囚之自縊死  
璣字太璞號復齋華陽人崇禎十三年進士授古田知  
縣調餘杭有政聲擢刑部郎中未赴寓江山南峯寺迎  
監國至紹興傾家輸餉城破不食死大成字魯生新昌

人以明經授金華訓導城破父子同死畧字同榮字日  
鍾萬厯四十六年舉於鄉崇禎十四年以薦舉授寧都  
知縣時流寇縱橫向榮禦之擒其魁七人邑賴以全十  
六年間李自成入境向榮有銅甲軍三百與鄉勇三千  
分布各關堡晝夜登陴自成聞其戒嚴而逸明年七月  
偵賊五百屯烏羊坑先有十八人伏關下向榮立捕殺  
之乃督兵出戰斬二百餘級生擒渠帥十五人餘皆竄  
去太吏以功薦之以忤馬士英遷吉安同知遂歸監國  
召之辭不赴及城破肅衣冠北向再拜投項村之崖死  
學伸字適我崇禎十三年以都督僉事升孝陵參將內

監張其蘊盜伐陵木學伸發其奸帝震怒盡撤天下鎮  
守內監公卿皆壯之然與宦寺水火矣乞假歸城破衣  
冠拜闕死天寧寺中進志崇禎時官襄陽通判歸里城  
破進志被執子諸生萬照狂奔往救亂兵索餽貧無以  
應萬照願以身代兵不顧殺進志萬照奮不顧身以頭  
觸之亦遇害履祥復儀學伸登瑞

國朝俱

賜諡節愍大成向榮俱

賜入忠義祠

傅巖字野倩義烏人少孤貧及長好讀書作詩賦古文

詞皆鏘理刻肌風瀾特妙崇禎七年成進士授歙縣知縣舉循吏第一後以謫去官魯王監國擢儀制主事進江西道御史命監朱大典軍

大兵攻金華嚴與大典督兵出戰累卻之相持三月攻益急嚴請以子弟兵赴援大典許之夜縋而出嚴至義烏集義勇數百人帥子齡發齡將出赴援猝遇

大兵嚴不顧衆寡督義勇奮擊所殺過當

大兵急摩後隊數萬人至嚴力竭不支被殺齡年十四見嚴刃將及以身蔽翼其父刃著頰而死齡發起救矢透在腋而仆少頃復甦見父弟死慟哭曰吾家可謂



無負國恩矣遂以

熙字長穆嚴

國朝

賜謚節愍齡發齡熙俱

賜八忠義祠

高岱字魯瞻號白蒲會稽人崇禎三年以武學生舉順  
天鄉試被黜久之辯復舊王監國授職方主事及江上  
師潰慨然曰上恩厚矣國家文武異途輕武重文帖嘿  
小生持議廟堂而戮力疆場者指爲粗人以致寇盜充  
斥不能抗禦神州陸沈職是故也我本武學授是文職

偪側搶攘無益毫髮尙不能以一死報國乎劉念臺吾  
鄉先生也吾當師之卽絕粒祈死子諸生朗坐守之閱  
八日泣拜父前曰父素教兒忠孝國不可無臣家不可  
無子兒請先往泉下埽除岱瞻日曰有是哉爾乃能先  
我朗攜巾服出門兄澄出而追之曰余長子當隨父死  
汝次子當養母朗厲聲曰死而隨父易貧而養母難吾  
爲其易者言畢奔偸江泛小舟給舟子出海禱神去岸  
遠北面再拜躍入海中舟子急挽之齧舟子臂始得下  
舟子又入水救之摔其中朗躍出水面正巾而沒岱聞  
之曰兒果能先我乎自是不復言數日亦卒葉汝蘅字

衡生與岱同邑人同年舉鄉試監國授兵部主事與岱  
友善每會食相與抵掌談忠孝事聞變出居桐塢墓所  
岱送之曰君殆隱於是乎曰非也我無城守責死於墓  
所爾遂與妻王氏偕赴水死王氏被戮次日復死岱汝  
蘅

國朝

賜謚節愍郎

賜入忠義祠王氏

賜入節孝祠

李桐字封若號伺菴鄞人聞京師陷於哭臨所抗言

國仇不可不報請發義旅次於江干以待撫臣勤王之  
舉寧紹台道盧若騰是其言未能應也桐乃日號咷當  
事馬前并詰責諸縉紳遂遭嗔怒且有欲除之者尙書  
馮元飈曰諸公卽自謂力薄不能報國仇柰何更殺義  
士乃邀至家呵護之若騰亦慰勞備至是以得免賦悲  
憤詩十章遂感沈疾浙東兵起桐命長子文景從軍魯  
王監國授文景兵部主事及江上破家人以湯劑進桐  
碎其器旬餘病劇卒塋畢文景與弟文昱墨纒赴海上  
監國授文昱戶部主事舟山破兄弟同日覆舟死海中  
汪涵字叔度奉化人少補諸生受業於黃宗羲宗羲起

兵涵參軍事歸安茅瀚字飛卿以浙西之使至江上涵  
與談兵大喜宗義留之使與涵共事皆從宗義渡海駐  
軍譚山聞江上師潰宗義諭軍士不願從者任所之尙  
得親兵五百人涵爲前導瀚爲後勁至四明山駐仗錫  
寺一日宗義偶出部下糧絕不得已取之山民於是山  
民以語邏卒導之焚寨夜半火起寨中倉皇出鬪皆徒  
手死者十九涵從烈焰中殺數人已得出歎曰所圖不  
遂命也不死且自取辱還鬪而死瀚亦沒于圍中

倪懋燾字仲晦號煜生鄞縣人諸生

大兵下杭州定海總兵王之仁與太僕少卿謝三賓先

納款及督師錢肅樂起兵三賓惡之貽千金於之仁令其以兵來殺諸首事者肅樂亦欲貽書之仁使之返旆而難其人爲使懋熹請之副華夏以行至定海聞先一日有陳秀才者上箋之仁責其負國爲之仁所殺俄而三賓之使亦至或勸懋熹無遽投書懋熹謂夏曰吾輩方將冒鋒鏑而懼死乎遂以書進之仁語曰二君此來大有膽懋熹對曰大將軍世受國恩賢兄常侍攀髯殉國天下所具瞻志士皆知其養晦而動也方今人心思漢東海鎖鑰在大將軍次之則舟山黃將軍石浦張將軍左提右挈須有盟主大將軍之任也之仁遽搖手曰

好爲之且勿洩令其子鳴謙飯懋熹與夏於東閣而別  
召謝使入見各具報書但曰以十五日至鄞共譏之謝  
使出乃遣懋熹與夏歸之仁曰語錢公當具犒師之禮  
明日之仁至齊三賓出兵餉萬金與肅樂肅樂勞懋熹  
曰此眞李抱貞之招王武俊也而君以三寸舌成之功  
過之矣魯王監國至紹興授懋熹職方主事參肅樂軍  
時唐魯爭頒詔之禮越使陳謙入閩而死閩使陸清原  
入浙而幽於舟議募一能者肅樂薦之懋熹奉使至閩  
告於唐王曰方今閩強越弱然無越則閩無所蔽且均  
爲太祖子孫乃區區爭虛號耶唐王悅畱之命以僉事

分守建寧時鄭芝龍盡取閩中兵餉歸於所屯之東石道標故有兵千人至是一空懋熹捐俸爲餉以募兵大兵攻建寧懋熹出戰力不支全軍盡覆遂沒於陣時丙戌八月十一日也

朱養時江陰人魯王監國入閩授職方郎中監國駐舟山進河南道御史轉禮科給事中台州分守道耿應衡遣人至舟山探虛實詭稱日者謂監國之祿命宜禳災星定西侯張名振設醮請監國行香養時上疏爭之謂如此舉動使人聞之當曰朝廷無人矣監國乃止舟山破養時抗節死時同死者通政使鄭遵儉御史梁隆吉



董廣生吏部文選主事李開國吏部主事楊思任戶部  
主事林瑛江用楫禮部儀制主事董元張家璧兵部職  
方主事朱萬年兵部主事顧珍劉午陽工部主事顧宗  
堯國子監學錄曾應選中書舍人曹威鳳林伯起張端  
江中汜陳所學顧行翁健工部營繕所正戴仲明副使  
馬世昌太醫院副章有期諸生林世瑛錦衣衛指揮王  
朝相內監官太監劉朝凡數十人遵儉義與侯遵謙弟  
隆吉監國駐紹興官職方主事從亾入閩擢御史命監  
定西侯軍手刃全家自刎死開國臨山衛人先驅妻子  
入井乃自投井死母自縊死瑛字玉之閩人同母妻壻

女五人從亾入浙墻隨鄭彩入海瑛至健跳母卒貧甚妻陳氏及女爲人紉衣給食已而女亦卒至是瑛與妻分梁同縊死家壁投城下不死被執令作重陽賦揮毫立就不屈死宗堯母亦死廣生有期自焚死珍中汜所學行健俱閤門焚死朝相大興人與劉朝聞城失守護元妃陳氏義陽王妃杜氏宮娥張氏入井用巨石覆之自刎其孀思任仲明鄞縣人用楫吳縣人珍宗堯長洲人元會稽人萬年世瑛閩人午陽伯起端永嘉人應選寧都人威鳳字儀公黃州人隆吉廣生家壁中汜所學行健世昌有期皆未詳其里養時開國瑛用楫元萬年

宗堯仲明

國朝俱

賜謚節愍世瑛

賜入忠義祠開國母瑛妻陳氏宗堯母俱

賜入節孝祠

傳日炯字黃中諸暨諸生與其叔平公同師事劉宗周江上師潰兩人相謂曰吾等義固當死然俱有老母在亦惟白於母許死則死耳平公白於母不許日炯白於母許之遂赴湄池死平公乃養日炯母終身同邑諸生方炯字煌中聞日炯死亦赴水死時諸生徇義者山陰

朱瑒象山婁文煥蕭山楊雪門浦江張君正瑞安鄒欽  
堯永嘉鄒之琦若夫韋布徇義山陰倪文徵范史真鄧  
縣張璉義烏王應麟云瑒字鴻書郡城破人皆竄伏瑒  
曰此日而生全歸之謂何書絕命辭於几上潛往礁石  
躍水死文煥字長明遷居定海少有大志詩文遠出流  
輩或以及第祝之則笑曰千里生民之業而但爾乎城  
破正衣巾哭先聖廟及祖祠徧詣親知與訣家人環哭  
而止之不可則兀立海濱之沙上潮至浮之而去越數  
日漁者見一屍隨潮而來視之卽文煥也顏色如生奔  
告昇歸殮之雪門自縊死君正字子性許都之陷浦江

城其黨吳奎欲謁孔廟君正曰吾先聖禮義之堂顧容賊入耶挾匕首將往刺之奎聞之不敢入至是士大夫有遠匿深山者君正曰死則死耳何匿爲夜入明倫堂縊死欽寔字維則徙居永康作書別父投永寧江死之琦素以名節自勵聞城破曰吾聞孝經身體髮膚受之父母不敢毀傷今日可爾耶赴水死文徵字舜年爲蒙師兼業鹽市酒飲里中少年求辦一事有諾之者偕之墓所命掘坎自瘞衆駭欲散文徵曰此何事可誤乎或尼之曰死固義也今某某俱不死汝何自苦文徵曰人各行其志惟諸公玉予於成也或曰豈可使土侵膚乎

以二缸贈之埋於坎中文徵跌坐其內命覆之聞內叩  
聲衆曰一時感興吾固知其欲出也發之文徵曰入時  
不知方位耳北面再拜復命覆之史直資石投淵死漣  
字子隆號四岑聞變閉戶坐室中取牀頭酒獨酌既醺  
遽牀而走復索酒飲之連舉數百杯自摩其頂往竈下  
得炭火滿甕和以木屑置牀下寢其上覆以重裘時天  
暑熱酒力增盈而絕應麟城破時隨父出避父爲亂兵  
所執勒金錢將殺之應麟抱父訴曰家貧無所有若欲  
父願以身代乃殺之父獲免日炯瑋文煥君正欽堯之  
琦

國朝俱

賜入忠義祠

趙景麟字天生鄞縣諸生丙戌六月江上師潰景麟題詩曰書生不律難驅敵何處秦庭可借兵只有東津橋下水西流直接汨羅清誓死不食其家多方慟解不能得願景麟以曾借友人金未償爲愧委曲措置得之詣友人家返金友人訝之景麟笑而不答卽往城東躍入江漁舟驚集出之水得甦昇之還家張目不語且病亦不食其門人徐生聞之強輿入太白山中勸食不可則爲謬語以慰之曰東山李都御史長祥克紹興矣曰舟

山黃將軍斌卿奉監國來恢復矣曰石浦張將軍名振奇捷矣曰四明山寨下慈溪矣景麟乃進食如是者半年景麟病愈出問樵夫近事曰天下大定更何問焉景麟大慟踣地更不復食至十二月杪乃死越明年而葉上高又死焉上高字而立又名天章永嘉諸生

大兵下温州上高佯狂披髮出行幅巾大袖賦詩曰安得蜉蝣易生死猶存楚楚好衣裳被執下獄得釋丁亥二月上丁乘知府朱釋箕上高攜水一杯芹一束祭文一篇哭而入其文曰嗚呼宗祊猶在兮恨離離之彼黍髮膚致毀兮悲藁葬之匪我裸將堂上兮何莫非先朝



之彥奔走堂下兮又誰非聖人之徒嗚呼藐藐予躬兮  
自分爲識君臣之蠅蟻悠悠我思兮寧復作不知春秋  
之蠅蚘知府見其文大怒繫之獄追至五月四日上高  
語獄卒曰詰朝屈大夫沈湘之日吾其死夫明日賦詩  
有未吞蒲酒心先醉弗浴蘭湯骨已香之句自縊死景  
麟

國朝

賜入忠義祠

外史曰嗚呼予旣書諸臣之死尤重諸臣之得其死也  
彼垂紳縉笏身遭改革而苟焉降附者比之彥回之不

死矣乃猶籍告變爲已功獨何心哉

傳第九

魯之春秋卷五

海鹽李東園

清節

董守諭

林時躍

余增遠

李文纘

陸符禹 泰等

張岱 陳洪綬等

查繼佐 兄繼坤等

周之璠 劉均等

昔夷齊叩馬而逃箕子佯狂以避後之希風前哲代不乏人粵稽江上師遺諸臣以東籬北窗之風守殘山剩水之節以終其身大率皆以文山幕中人相爾汝可謂

盛矣作清節傳第九

董守諭字次公鄞人天啟四年舉於鄉魯王監國駐紹興時司餉不得其人戶部尙書李白春薦之曰國命倚於餉司非守諭不可乃召守諭授戶部貴州司主事未幾而方國安王之仁有分餉分地之議分餉者國安之仁之兵謂正兵食正餉以六家軍之兵謂義兵食義餉正餉田賦所出義餉取給於富室捐輸無名之征也分地者某正兵支某邑正餉某義兵支某邑義餉有旨會議國安之仁之司餉者皆殿陸誨然守諭厲聲讓曰爾等今日所爲何事而不畏咫尺天威乎乃跪奏監國前

曰分餉分地非也當以一切正供悉歸戶部覈兵而後  
給餉覈地而後酌給之先後所謂義餉者雖有其名不  
可爲繼義兵食義餉是散遣義兵之別名監國然其言  
而不能行無何之仁請稅漁船守諭曰今日所恃者人  
心耳科及漁船其細已甚民勿堪也之仁又請塞鄞之  
金錢湖爲田又請稅人法又請官賣大戶祀田三疏既  
上兵士抽刃守諭門以待覆守諭覆湖不可塞祀田不  
可官賣稅人必至激變之仁大怒謂朝廷大臣尙不敢  
裁量幕府何物豎儒乃爾事事中格乎上言得孟軻百  
不如得商鞅一得談仁講義之徒百不如得雞鳴狗盜

之雄一遂折簡招守諭欲殺之以洩憤監國雖惜守諭  
甚不能爲力陰使守諭避之守諭慷慨對曰餉司命吏  
生殺聽於主上非之仁所得專桓溫劉裕何許姦雄亦  
必託晉陽之甲無敢擅出一檄執朝臣而去者臣歸死  
上前之仁能以臣血濺丹墀之仁迫於大義乃止丙戌  
三月十九日烈皇帝大祥寺諭請哭臨一日三軍縞素  
監國從之行人陸培同知王道焜皆死節廷議諡培忠  
毅不及道焜守諭爭之道焜乃得諡節愍監國累欲遷  
守諭官而難其代者乃加守諭兼經筵日講官江上師  
潰守諭乃歸閉戶著易卒年六十九

林時躍字霞舉號荔棠副都御史時對兄以諸生貢於  
廷有文名監國授大理評事尋及職方主事華夏死其  
妻陸氏將縊忽徘徊曰吾一子已殉僅存一子挈之死  
則絕嗣留之則辱將若之何時躍聞之曰是易耳乃竊  
取其子匿於家而取瘞子以代當時偵邏四出儻遭發  
覺禍且不測而時躍不顧也踰十年為之婦哭而誡之  
曰汝忠臣之子也汝父死吾捧頭而殮之汝母死吾躬  
市槨木也吾亦不料其保身以保汝也今幸矣吾不負  
汝矣雖然父不肯帝子不肯王不具此骨汝終非華氏  
子也汝負吾矣乃為之復姓而遣之諸遺民為賦孤兒

行以紀其事時雖自丙戌後周旋忠義之後甚久兵部侍郎張煌言轉徙山海密書往復一歲數矣時躍為之飛書發使及煌言散兵時躍鬱鬱而卒

余員增遠字謙貞兵部尚書煌弟崇禎十六年成進士授寶應知縣劉澤清鎮淮安勒有司庭謁增遠不屈棄官歸魯王監國召補儀制主事進郎中煌投水死增遠逃山中不出郡縣追捕增遠捷城南以待死久之事解所居草屋三間躬親農圃同年生王爾禔為海道求見增遠辭以疾一日屏騎從造其廬掀帷直入增遠擁衾不起曰不幸有疾不得與故人禮爾禔執手勞苦未出門



數步則已與牌子擔糞灌園矣爾祿遙矚嘆息而返冬  
夏一阜帽雖至晚者不見其科頭年六十五卒蓋二十  
四年不離城南一步也

李文纘字昭武號學樵鄞人佐督師錢肅樂起兵迎魯  
王監國以諸生授車駕郎中丁亥六月由天台入舟山  
欲從監國於閩御史馮京節第勸其聯絡山寨以為監國  
援乃歸與評事董志寧職方華夏謀以起事十二月謝  
三賓得其帛書告之文纘下獄夏獨承其事謂文纘等  
皆不預謀文纘強項斬斬不撓夏嘆曰昭武故文弱不  
意骨力若此未幾有司將坐夏而釋其餘文纘獨請留

伴夏有司怵之曰汝不畏死耶文縉笑曰白首同歸吾  
亦何恨遂留獄明年再訊文縉再被拷終不屈而夏力  
辯之乃放歸文縉嘆曰過宜生我過宜之義我之慙也  
雖然我不求生過宜自成其義耳嗚呼過宜何曾死我  
虛生矣已而御史楊文縉亦死於難文縉以其子騶娶  
其妻因撫之追踐囚中之諾也已亥兵部侍郎張煌言  
兵敗聞道歸文縉募死士衛之煌言得復入林門亂定  
文縉邀游四方倣謝翱為遊錄

陸符字文虎鄞人與同邑萬泰齊名時稱萬陸崇禎四  
年符以諸生應詔入太學帝幸太學諸生迎謁見符儀

表屢目之十五年舉於鄉監國賜進士出身授行人奉  
使閩中不果行命清查衛所錢糧千戶馮如奎乾沒獨  
多嚴覈之如奎遂拔刃刺於廳事不殊謝事養病山中  
未幾卒泰字履安崇禎九年舉於鄉監國授戶部主事  
司餉山寨之役友朋皆坐繫泰周旋出之以遺民終其  
時苦節自勵者泰同邑李文靖駱國挺邱子章王玉書  
徐振奇徐鳳垣董應遵董德偁紀五昌紀許國全大和  
全大程全美閑陸寶宗誼楊秉紘周元初周元登周元  
懋周元越李振璣李振玘倪元楷李文燿李允智林祚  
隆沈士穎葉謙云文靖字在茲監國授職方主事後無

子或勸置妾歎曰謝臯羽有子棄之吾反求之耶國挺  
字天植參督師錢肅樂軍事監國授職方主事臨江督  
戰礮火從頸邊過弗懼子章字含三監國授中書舍人  
從亾入閩歷舟山舟山破從亾次廈門後避地轉徙授  
徒洞庭山中年七十諸遺民方創爲耆社迎之歸一歲  
卒玉書字水功監國授太常博士後遁跡榆林振奇字  
可貞號我庸監國授戶部主事後隱青雷山中鳳垣字  
掖青監國授監紀推官後苦節自矢高宇泰嘗曰四十  
年來能依然如處子之耿介者掖青與霞舉耳霞舉謂  
林時躍也應遵監國授行人破家輸餉後逃入大梅山

爲僧德偁字天鑑有孝行崇禎九年舉于鄉明年中會  
試副榜監國授戶部主事辭不赴五昌字文東師事錢  
肅樂天啟四年舉鄉試授推官監國授御史後痛哭隱  
大白山中許國監國授儀制主事監國航海追扈不及  
鄭成功聞而客之許國忠義之志溢於威儀成功不以  
禮不敢見後卒於海上大和字介石號他山大程守襄  
孫號式公監國授大和大理評事大程太常博士大程  
子吾騏年十七亦從軍江上美閑字吾衡監國累遷御  
史監軍監國入聞美閑納貢不倦後被執美閑曰吾不  
可辱一夕卒寶字敬身崇禎元年以太學高等授中

書舍人典制詔二年以邊事請自効帝下詔褒之以母老乞養歸監國駐紱與傾家輸餉召之入朝辭不赴誼字在公世雄於資而誼獨好詩肅樂起兵誼罄所有徑送肅樂營肅樂薦之監國授以官誼曰是以卜式待我也不赴晚年授經餬口安之若素秉紱字祁牧從軍江上見事不可爲不受官其後周旋殉節後事甚力其居遭火所著書盡焚秉紱歎曰我已無國無家今又無書是天多我也因號天多老人元初字自一號立之禮部尙書應賓嗣子應賓恩膺元初護於同祖昆弟元初與弟元登元懋元越同佐肅樂起兵皆破家輸餉監國以

元初明經援應賓恩膺授郎中不受白袷參軍事元登  
以恩膺官刑部郎中歸監國召起故官從亡而卒元懋  
字柱礎號德林以恩膺官南京右軍都事遷戶部屯田  
郎中權楊關奉使蜀中知思南府丁母艱未赴監國召  
之以憂固辭江上破投水浮沈一里有餘爲人所救得  
不死後爲僧佯狂醉死元越字石公監國授以官亦不  
受振幾與弟振玘皆禮部尙書康先子魯王監國以康  
先廕振幾尙寶司丞振玘前軍都督府都事未赴而江  
上破壬寅正月振幾預山寨事被逮下獄振玘竭所有  
營救得免元楷字端卿監國授大理寺評事江上破歸

不薙髮被執入獄論死其母遣人以酒入獄飲元楷至  
大醉而盡薙其髮元楷醒痛哭欲自刎或以母命止之  
歎曰吾竟不得與仲晦白首同歸仲晦謂其族人懋熹  
死建寧者也遂終身不出文燿與弟允智皆從軍江上  
監國授文燿大理寺評事允智參軍其後皆坎坷卒祚  
隆字永如吏部侍郎棟隆弟崇禎中以孝秀徵至京因  
兄嫌辭歸督師錢肅樂帥師迎魯王祚隆助太常卿莊  
元辰任城守事後隱居剡源九峯山士穎字哲先諸生  
上表問監國起居爲人所首下獄高斗權營救得免諱  
字天益世襲千戶以督功進守備監國時以督師錢肅



樊屬雍都司事去授徒養母越二年卒董劍鏐陸宇燦  
奉其母終身

張岱字宗子山陰人參議汝霖子汝霖嘗官山東副考  
官與魯王藩邸有舊監國駐紹興幸岱第授職方主事  
未幾辭歸方國安又遣使幣聘岱以疽發背不赴後避  
兵隱居剡中岱幼有神童之名及長文思益涌好結納  
海內勝流家世通顯服食豪侈日聚諸名士度曲徵歌  
諸童雜進及閒以古事挑之則自四部七畧以至唐宋  
說家叢殘瑣屑之書靡不賅悉及亂後隱居意緒蒼涼  
語及少壯穠華自謂夢境著書十餘種率以夢名而石

匱書紀明代事尤備年八十餘卒其與岱隱居不出者  
有諸暨陳洪綬餘姚諸來聘呂章成奉化王咸來云洪  
綬字章侯工畫監國幸岱第洪綬陪宴不勝飲嘔噦御  
座旁監國命書筵洪綬捉筆不起止之後縱酒狎妓滅  
性而卒來聘以諸生貢於廷好大言參江上軍事乘馬  
出入諸營意所不可輒曰某日吾當上書劾某人某日  
吾當上書言某事酒酣耳熱初未有意爲之也聞者以  
爲實然方國安惡之令將俞玉收置水獄將以戮砲來  
聘父行賂得免來聘遂閉戶不出章成字裁之大學士  
本孫與陳國輝善國輝薦其才監國授翰林院待詔章

成曰悍將驍兵日事寇釁越城中顛蹶狼狽救死不遑  
豈復可爲之日耶卒辭不赴函輝死章成走台州哭之  
後以遺民終戚來字征南少補臨山衛把總監國擢都  
督僉事副總兵官後與華夏勾致島師蠟書往復不倦  
夏死戚來終身灌園

查繼佐字伊璜號東山海寧人生有異才詩文詞曲皆  
作未經人道語崇禎六年舉於鄉魯王監國駐紹興繼  
佐與兄繼坤至江上乞師繼坤薦陳萬良萬良得封蘇  
繼佐監國授職方主事營於江上明年命從御史黃宗  
羲出師渡海劄譚山而江上師潰乃家居開講學於杭

州鐵冶嶺之敬脩堂弟子著錄甚衆有知人鑒嘗識海陽吳六奇於行乞中後湖州莊氏史案發覺繼佐幾罹禍卒賴六奇力獲全其時與繼佐先後至浙東者同里則有查大緯姚翼明顧名佐吳乃武錢唐盧之頤嘉興徐肇森巢鳴盛海鹽吳麟武平湖馬萬方皆固守殘山剩水之節以終其身大緯字公度繼佐叔父以諸生貢於廷監國授武選主事翼明字興公監國授職方主事從亾入閩後爲僧所稱獨耀上人是也名佐諸生先繼佐至浙東乞師從督師熊汝霖出師定海寧乃武監國授兵部主事御史黃宗羲出師浙西乃武以兵會之創

譚山宗義兵退乃武遂散兵之願字子綽監國授職方  
郎中後隱於醫肇森字質可隨州知州世淳子世淳殉  
寇難肇森自楚走京師詣闕以聞得贈卹以弟肇樑殉  
父死護其廬於遺孤肇森至浙東監國授職方主事丙  
戌以母憂辭歸聞江上師潰哀憤卒鳴盛字端明崇禎  
九年舉於鄉乙酉七月渡錢唐江上書監國授以官鳴  
盛目擊方國安果橫辭不就遂還家墓側構數椽隔溪  
築一小閣屋外植短籬栽橙橘百本親自荷鋤種菜以  
自給麟武字玉書號耐庵太常少卿麟徵弟以諸生貢  
於廷授江西布政司理問福王立遷萬年知縣擢饒州

通判監國授職方主事參督師熊汝霖軍事萬方字遐卿嘗爲其父上書幾中璫禍復上書吏部白冤事稍解後乞師授浙西命從汝霖出師被執逸去入閩依汝霖死海上

周之璿字敬可山陰人師事都御史劉宗周江上破之璿負宗周遺書與宗周子灼同避兵中途累爲邏者所厄之璿流離播遷謂灼曰死則俱死不負吾師以生而灼護髮未雍之璿曰事急矣詭與灼披緇事定歸家則田宅盡爲人所奪遂無一廛或勸訟諸官之璿曰吾不忠不孝投死他鄉何顏復璫獄與人其對簿遂寄食於

汧家以死汧字伯輝有異質能傳父業隱居剡溪之秀  
峯避人匿跡講學終身其師事宗周與之璿汧甘守首  
陽之節者則有戴易張應黿張成義劉應期董瑒趙旬  
張應煜徐芳馨惲日初葉敦艮云易字南枝應黿字莫  
夫皆之璿同邑人易嘗葬吳人徐枋爲世所稱應黿福  
王時作中興金鑑欲上之不果成義字能信應期字瑞  
當皆慈谿人魯王監國航海成義起兵山中不克行逕  
應期丙戌後以憤死瑒字无休旬字禹功俱會稽人瑒  
有高行旬事親孝皆丙戌後爲僧應煜餘姚人宗周絕  
食應煜勸以起兵宗周歎曰事不可爲曰然則是降城

亦非先生死所也宗周瞿然是其言遽出城芳馨字穉  
之蕭山人通兵法日初字遜庵武進人嘗上書申救宗  
周丁亥麥山寨軍事後爲僧敦良字靜遠西安人棄諸  
生隱居講學

外史曰嗚呼茫茫桑海季漢月表之不作志士之埋沒  
蓋亦多矣諸臣之耿耿不下其亦如謝臯羽所云死無  
以藉手以見信國而爲此翹絕之行乎死於兵耶死於  
饑耶死於緇黃耶要之不愧於古人其仁一也



傳第十之一

魯之春秋卷二十一

海鹽李聿求學

勳衛一

鄭遵謙

方國安

王之仁子鳴謙等

陳謙

張鵬翼

陳萬良

張名振弟名揚等

天或不與雖人謀盡善必生物以敗之浙東之方王無  
論已而况海上之局勳衛柄之更勝迭負強者當國互  
相魚肉鄭彩始與鄭遵謙稱兄弟已而殺之又與周瑞

爲父子不久卽交惡周鶴芝亦嘗門生於彩已而交鬪  
鶴芝與瑞乃兄弟相嫉如仇此閩中諸帥之畧也黃斌  
卿尤猜忌連殺荆本徹賀君堯雖與張名振爲親家思  
并其軍又欲殺王朝先名振部將阮進旣歸斌卿已而  
又與斌卿交惡名振又枉殺朝先此浙中諸帥之畧也  
作勳衛傳第十

鄭遵謙字履恭會稽人山西僉事之尹子少喜任俠輕  
財結客不爲繩墨之士所禮與東陽許都善喜遊狹邪  
名妓金氏一見喜曰豪士也遂耦焉遵謙挑其侍婢金  
氏殺之諸不逞於遵謙者屬婢家訟於官繫金氏獄詞

遵謙謀逆不出對簿而散千金與金氏日酣飲獄中  
差官陳子龍論遵謙死許都請曰天下方有事公奈何  
殺豪傑子龍乃出之及都因縣令逼索作亂遵謙謀應  
之其父局其室不得出乃止南都破奄人屈尙志逃至  
越遵謙箠殺之曰吾聞劉念臺先生曰凡係逃官皆可  
誅也六月杭州不守紹興通判張懷納款卽以懷署府  
事又以彭萬里署縣事遵謙乃召故所知謀起兵卜之  
繇曰清風萬里封侯之卦也遵謙謀於正宸乃與副將  
蘇材吳明傑等詣演武場告於衆曰天下事尙可爲我  
欲舉義旅何如衆曰惟公命乃樹纛誓師值懷與萬里

禱雨郡城隍廟至清風街遵謙曰卜繇示我矣急擊勿失也遂執懷萬里斬之集紳士議餉尙書商周祚姜逢元等皆至有以家貧辭者遵謙叱之曰若受高官厚祿數十年今國破君亡尙欲擁厚貲安享耶驅出將斬之衆股栗乃聽命其父自杭州納款歸見之大驚禁之遵謙不顧絕裾去遣子懋繩帥吳明傑以兵三千迎魯王監國駐紹興授遵謙中軍府左都督掛義興將軍印賜一品服尋進封義興伯營於小鹽渡子龍聞之貽書曰僕眞淮陰惡少不識韓王孫當是時方圖安日議分餉分地置國事於不問遵謙以家財餉軍不至乏食然愧

悒不得志日以聲色自娛明年三月王之仁帥師渡江  
遵謙助之獲鐵甲八百餘副江上破監國航海唐王遣  
使召之遵謙帥師未至閩閩亦破漂泊閩海監國次長  
垣遵謙帥師入衛監國喜甚進封侯帥陸兵營於牛田  
軍容甚整所克州縣遵謙之力居多海中洋船皆統於  
鄭彩遵謙取二艘器械萬計由是爲彩所惡遵謙爲人  
疏誕不慮後患大學士熊汝霖爲彩所殺遵謙不平形  
於辭色彩欲殺之僞建部將吳輝輝扶傷就遵謙求書  
投鄭鴻逵遵謙入輝船送之被擒輝旣擒遵謙而慙於  
相見伏艙底不出遵謙呼曰汝爲鄭彩所養殺我豈出

汝意而相避乎輝出遵謙乞隻雞孟泰哭奠汝霖畢赴海死監國聞之大怒曰殺忠義以斷股肱生何益耶欲跳水死左右與彩勸止乃究首謀十餘人磔之金氏在軍中束橐像彩每饋食斬彩像以侑哭彩聞之沈之海中金氏屢顯靈異人稱小金夫人遵謙

國朝

賜諡節愍

方國安字磐石貴陽人崇禎時官總兵福王時鎮池口魯王監國封鎮東侯進荊國公守嚴州督師于潁克富陽國安乃營於七條沙十一月監國勞軍於江上築壇

拜將命各營皆守受國安節制時馬士英阮大鍼在國  
安營求朝見不許令立功自贖國安營有士英大鍼二  
人日議分餉分地以殺異己者爲事而國安置之不問  
矣十二月有諸生四人詣國安營降國安信之悉引兵  
從西湖山中入

大兵伏於其中國安至副將張膽猝然出擊國安大敗  
於五雲山白塔嶺死者二千餘人監國親祭陣亡將士  
於江干明年五月

大兵以江水涸可試馬發大礮擊國安營竈盡燬國逢  
安曰天奪我食矣遂拔營走紹興劫監國以行至黃巖

大兵國安決計獻監國爲進身地遣人守監國守者病  
監國得脫國安降遂命從征至延平惠國安反覆誅之  
從子元科同死元科監國授總兵官封威遠伯驍勇敢  
戰渡江大戰總督張存仁在行間會天風雨

大兵退師入城元科追之至草橋門直前斫存仁存仁  
策馬疾馳斷其馬尾國安降後

大兵將誅之愛元科勇欲留麾下元科不可請同死初  
福王之走太平也士英奉王母妃以黔兵四百人走杭  
州守臣以總兵府爲母妃行宮潞王及羣臣往朝母妃  
出服赭一紫衣女官侍令官吏士民皆入見傳命召用



在籍諸臣時江北巡按彭遇颺適至命以僉都御史募兵兩浙翌日劉宗周熊汝霖入朝汝霖責士英當從王士英無以應然猶盼上江捷音不數日大鋮與國安俱倉皇至知王已被擒次日請潞王監國迎母妃入府從巡撫張秉文及陳洪範等計迎款而已未幾

大兵至潞王遂帥衆開門同母妃出降士英遂與國安渡錢唐江立營大鋮投督師大學士朱大典於金華大典留與其治軍士民不可檄逐之大典乃送大鋮於國安營大鋮掀髯指掌曰談兵國安甚喜大鋮乘間言大典之富聳國安攻金華以雪逐已之耻士英以南渡之

壞半由大賊而已居惡名頗與大賊相矛盾思立功以邀監國之知請入朝諸臣力拒之欲入閩唐王亦以罪大不許國安降士英遁入新昌山中

大兵追之其總兵葉承恩等降并報士英披雍爲僧至寺拘獲斬之大賊至江干乞降命從征死僊霞嶺石上王之仁字九如巴陵人崇禎時官松江總兵福王調寧紹總兵統水師

大兵下浙東之仁納款旣而悔之受督師錢肅樂約迎魯王監國駐紹興封武寧侯加太保營於西興進爵興國公督師大學士張國維議分道齊出方國安先敗之

仁與熊汝霖陳潛夫血戰下流國安得還之仁上疏言  
事起之日人人有席卷天下之心乃一敗之後遂欲以  
錢唐爲鴻溝天下事尙何忍言臣願帥所部沈舟一戰  
今日欲死猶戰而死他日卽死不能戰也明年三月

大兵入江之仁與國維義興侯鄭遵謙統水師襲戰是  
日東南風大起之仁揚帆奮擊碎舟數百艘遵謙獲鐵  
甲八百餘副得捷而還五月國安拔營刼監國以行諸  
營聞之皆潰惟之仁營兵不潰國維欲分之仁兵五千  
守各營之仁泣曰壞天下事者國安也敵兵數十萬倏  
然而渡孤軍何以禦之之仁有舟可入海公無舟可速

爲計乃手縛妻子沈之蛟門捧所封敕印北面再拜投  
之江之仁航海達吳淞冠帶登陸被執至江寧死子鳴  
謙監國授總兵守定海鳴謙之守定海也思所以張之  
招張國柱軍以爲助國柱劉澤清之標將有弓箭兵五  
百人其力足以制鳴謙乃劫鳴謙入內地大掠餘姚使  
部曲張邦寧掠慈溪朝中震恐授以勝鹵將軍始去國  
柱乃據定海爲巢穴鳴謙反爲所制由是之仁懷內顧  
之憂無心復戰當是時江上諸軍惟方國安與之仁最  
強而國安橫有分餉分地之議之仁亦效之由是與  
諸軍不合雖之仁稍愈於國安至是大壞於鳴謙江上

師潰鳴謙至舟山黃斌卿誘擊之并其衆國柱乃悉率  
海之師以攻斌卿斌卿知陸戰不能勝之使百姓乘城  
而身帥水師出洋力戰三晝夜不能當乃乞師於富平  
將軍張名振名振遣部將阮進援之進精於水戰以四  
舟衝國柱營秋濤方漲乘之發礮無不靡碎國柱僅以  
身免乃刼張妃世子遁遂獻妃及世子而降鳴謙乃削  
髮爲僧名宣在其時武臣則有毛有倫有倣吳凱裘尙  
輿云有倫淮陰人官定海副總兵監國進保定伯有倣  
有倫弟授靖南將軍與之仁同駐西興有倣請軍於龜  
山爲浙西聲援從大理少卿陳潛夫出師劄譚山江上

破流寓海寧監國航海命有倫扈張妃陳妃世子由定  
海而出至舟山張妃爲國柱刼去陳妃在副舟得脫後  
有倫降尙夷監國授宣義將軍

陳謙武進人崇禎末官三衢總兵魯王監國加左都督  
封靖遠侯守衢州奉使入閩啟函稱皇叔父不稱陛下  
唐王大怒欲斬之命鄭芝龍取其侯印爲驗謙齎印卽  
召入御史錢邦芑誣謙久住三衢徘徊浙閩之界自以  
舉足左右爲重輕因欲要取侯封以閩要浙以浙要閩  
祇持構鬪之謀敢行挾制之術又誣謙姦淫不法遂收  
下獄芝龍疏救不允初謙賁福王詔封芝龍南安伯芝

龍德之故力爲申救行賄五千金於邦芭請免謙罪邦芭以聞唐王決意斬謙命邦芭監刑芝龍聞之過市令且停刑亟入朝請以官贖謙死唐王密敕促行刑故與芝龍久語芝龍出而謙已死芝龍伏尸哭極哀厚殮之謙子御六字雪之魯王監國至長垣授總兵後從亾至舟山舟山破御六從鄭成功在海上乙未十月御六與英義伯阮駿圍舟山據之丙申八月

大兵攻舟山再破御六赴海死之

張鵬翼字羽宸諸暨人崇禎時官淮海將軍守射陽等處福王加總兵南都破與參將徐洪彥從海道朝魯王

監國於紹興授衢州總兵加中軍都督府左都督封永  
豐伯命與洪彥其守衢州十二月江上兵敗鵬翼帥師  
赴援明年督師熊汝霖疏請援平 伯陳萬良於浙西  
鵬翼請行許之忽有旨命鵬翼援嚴州未行而江上破  
七月廿六日斬浙東招撫使徐準飭軍士嚴守

大兵乃攻衢州鵬翼弟繼榮勇冠諸軍出戰力竭死越  
日鵬翼副將秦應科爲

大兵內應城乃破鵬翼洪彥俱被執不屈死樂安王楚  
王晉平王皆被害洪彥監國擢衢州副總兵加都督同  
知繼榮亦授衢州副總兵加都督僉事嚴州破顧勳死



之紹興破俞玉戰死勳會稽人監國授左都督進封斫  
夷伯守嚴州兵敗劄營相拒累日閤門死玉山陰人嘗  
爲方國安中軍監國封定安伯鵬翼

國朝

賜諡烈愍

陳萬良字鳴皋程和人督師熊汝霖議出師浙西海寧  
查繼坤薦萬良員汝霖以書招之魯王監國授平陽將  
軍汝霖遣部將徐明發渡江援萬良時萬良方爲

大兵所困明發至萬良得免明發殺臨平稅課司主北  
陸萬良與明發合軍劄五杭分巡嘉湖道修國器出戰

萬良擊敗之焚其大舟二奪小舟二十餘大礮四甲三  
弓三十一刀槍共一百四十餘時十月二十二日也次  
日劄新市次日劄雙林次日遂至吳江次日以軍無繼  
退五杭復退臨平次日至天開河逢

大兵邀擊之萬良力戰得相持適汝霖以兵至明發得  
渡江以功萬良進封平伯未幾萬良請兵三千給半  
月餉浙西可定疏三上汝霖力爲措餉無舟以兵陸進  
會萬良幾克德清而內應之兵先潰良與伯吳易以軍  
來會而汝霖所遣之兵以無繼先渡江

大兵出擊易大困萬良入山自保江上破萬良軍亦敗

萬良爲

大兵所執不屈死

張名振字侯服江寧人少伉爽有大畧壯遊京師東厰太監曹化淳延之爲上客奄人中惟化淳以王安門下故與東林親名振亦遂得與復社諸人通聲息行人司副熊開元之廷杖也名振陰屬杖者得不死而名振實未嘗識面也崇禎十六年授台州石浦游擊

大兵下杭州遣安撫使至浙東名振獨不受命已而魯王監國駐紹興加名振爲平將軍時肅南伯黃斌卿以唐王之命守舟山舟山與石浦相犄角斌卿因與名振

爲姻薦之唐王時閩浙方爭而二軍兼受唐魯之命議  
由海道窺崇明擾三吳以爲江上之援未行江上師潰  
方國安欲以監國降監國得脫名振遣中軍方簡具舟  
迎監國至石浦之南田名振棄石浦扈監國入舟山會  
叛將張國柱攻舟山斌卿求救於名振名振遣水師營  
將阮進擊破之因勸斌卿納監國斌卿不從名振計無  
所出適永勝伯鄭彩至以其軍其扈監國入閩封定西  
伯進封侯名振見閩中諸將林立請歸浙招故部以壯  
其軍及還而石浦已內附乃至舟山依斌卿斌卿見名  
振之以孤軍依之也稍悔之丁亥松江提督吳勝兆來

通欵請一軍爲援願以所部合力向南都斌卿不應名  
振方有以自遠於舟山之志因請以其軍赴約而都御  
史沈廷揚兵部侍郎馮京第僉都御史張煌言爭勸之  
名振奏請欵印二百道命煌言爲監軍職方郎中任其  
副之僉都御史徐孚遠充行人司使名振帥弟都督  
名相聯餘二千整軍抵崇明遇颶風盡喪其軍名相與  
廷揚被執死名振與京第煌言等得逸復入舟山斌卿  
以名振之無軍也益侮之乃招故部營於南田而黃張  
之隙始構己丑監國閩地盡失復入浙名振由南田復  
健跳所與阮進迎監國次於健跳斌卿不至進使人告

繼於斌卿又不得斌卿又不遣使至健跳問官守於是  
名振與諸將議海上諸島惟舟山稍大而斌卿負固不  
若其討而誅之則監國可駐軍乃傳檄討斌卿斌卿見  
諸軍大集度不能抗乃上表待罪請迎監國以自贖名  
振許之而進卒擊殺斌卿監國乃駐舟山名振加太保  
當國庚寅名振殺平西伯王朝先朝先部將皆詣

大兵營降請爲嚮導以攻舟山辛卯秋

大兵攻舟山名振以蛟關天險海上諸軍熟於風信足  
以相拒必不能猝渡乃留阮進守橫水洋以弟左都督  
名揚中軍金允彥副安洋將軍劉世勳守城而自以兵

奉監國搗吳淞以牽制之或謂之曰物議謂公借此以  
避敵矣名振曰吾老母妻子諸弟皆在城中吾豈有他  
心哉軍遂發而進以反風戰死允彥縋城降世勳名揚  
力守急呼名振還未至城破名振母范氏妻馬氏以下  
姬妾自焚者數十人名揚偕其弟與名振妻弟馬呈圖  
馬貢圖及妾闔門舉火自焚死參謀軍事顧明楫及其  
妻皆死焉明楫順天諸生參名振幕十年名振欲薦之  
明楫固辭聞變衣巾走太廟題詩壁上有愁魂應傍孝  
陵之句對位大哭扼吭死名振聞信慟哭曰臣誤國  
誤家死不足贖欲投於海監國與諸將救之而止乃復

扈監國次於鷺門癸巳與煌言以軍入長江獲金允彥  
磔之遙祭舟山死事諸臣劉營崇明直抵金焦遙望石  
頭城拜祭孝陵題詩慟哭有十年橫海一孤臣之句甲  
午正月復以軍入長江掠瓜州儀徵深入侵江寧之觀  
音門時上游有蠟書請內應故名振再舉而所約卒不  
至乃還復屯軍南田乙未舟山復爲海上所有名振徒  
步入城祭其母慟哭哀動三軍十一月二十八日名振  
卒遺言令以所部歸張煌言悉以後事付之煌言爲葬  
於蘆花壩名揚

國朝



賜諡烈愍明楫

賜入忠義祠名揚母范明楫妻俱

賜入節孝祠

傳第十之二

魯之春秋卷二十二

海鹽李聿求學

勳衛二

鄭彩鄭聯

周瑞

周鶴芝楊耿等

阮進焦文玉等

王祁

王朝先

黃斌卿

鄭彩同安人芝龍從子劍眉長髯儀狀魁碩有智畧與芝龍異福王立以總兵官守采石磯唐王立封永勝伯後以兵敗降封恩宥伯魯王監國航海至舟山肅鹵侯

黃斌卿不納適彩至遣中軍平用將軍陳輝遂奏迎監國入閩時芝龍方議降

大兵令彩執監國以降彩不可匿監國而以南夷人貌類者服監國冠服居舟中謂守者曰苟事急則縊死以示之

大兵挾芝龍去乃已芝龍之子成功不肯隨父復起兵於海上然亦不肯奉監國改明年爲隆武三年於是彩奉監國次長垣改明年爲魯監國二年海上遂有二朔丁亥正月監國禡牙出師進封彩爲建國公署兵部尙書事彩軍聲頗振七閩所向無不披靡克復閩地三十

餘城惟七月與周瑞周鶴芝阮進攻福州不克爾彩恃功遂專政戊子彩殺大學士熊汝霖彩又惡大學士錢肅樂肅樂憂憤卒己丑七月閩地盡失監國次健跳彩棄監國而去庚寅周瑞周鶴芝有隙瑞南依彩鶴芝北依阮進會彩與成功爭左中所彩大敗泊沙埕具疏請援鶴芝與進既怨瑞而定西侯張名振欲結歡於成功帥師反擊破彩之餘兵彩遂入海成功以書招之乃歸死於家都將楊朝棟王勝楊權蔡新等皆依成功其族弟聯唐王時官總兵監國入閩次長垣聯以兵來會封定遠伯居中左所庚寅八月鄭成功兵敗潮州無地屯

兵欲襲中左所以居之彩知之率所部航海避之聯不能從又不設備將軍陳倖藍衍吳豪背聯而歸成功十五夜成功至聯方醉臥萬石宕宕距城東數里洞壑幽奇別墅在焉報之不得通詰朝酒醒出謁成功握手曰兄能以一軍見假乎聯倉卒知不敵唯唯而已成功麾軍進衆莫敢動未幾置酒召聯伏甲士殺之滅其屍遂并其軍

周瑞黃斌卿出師窺崇明所得也爲斌卿部將魯王監國入閩次長垣瑞以師來會封閩安伯己丑監國駐舟山瑞與平伯周鶴芝乘樓船三百餘艘分屯温州之

三盤以爲舟山嵛角山何與鶴芝有隙監國遣武陵人  
吳明中至三盤解之明中至三盤構之益甚瑞南依鄭  
彩適彩爲定西侯張名振所擊入海瑞亦入海

周鶴芝字九元福清人少讀書不成去而爲盜於海嘗  
往來日本以善射名與撒斯瑪王結爲父子日本三十  
六島每島各有王統之其所謂東京者乃國主也國主  
曰京王擁虛位而一國之權則大將軍掌之其三十六  
國主則如諸侯之職撒斯瑪王於諸島爲最強與大將  
軍爲首尾鶴芝旣熟日本故海中無不如意微行至家  
爲有司跡捕繫獄三年賄吏得解爲盜如故久之招撫

以黃華關把總稽察商船乙酉唐王加水師都督進平  
海將軍副黃斌卿駐舟山其冬鶴芝遣人至撤斯瑪王  
訴中國喪亂願假一旅以齊之存衛素之存楚望之撤  
斯瑪王告於大將軍大將軍慨然約明年四月發兵三  
萬一切戰艦軍資器械自取其國之餘財足以供大兵  
中華數年之用自長埕島至東京三千餘里馳道橋梁  
驛遞公館重爲脩葺以待中國使臣之至鶴芝大喜益  
備珠璣玩好之物以悅之參謀林學舞爲使期以丙戌  
四月十一日東行學舞解維斌卿止之鶴芝怒而入閩  
福州鄭芝龍議降鶴芝涕泣而謂芝龍曰鶴芝海隅小

命耳無所輕重所惜明公二十年威望一朝墮地爲天  
下笑請得効死於前不忍見明公之有此舉動也抽刀  
自刎芝龍起而奪之後數日芝龍竟去了亥魯王監國  
入閩次長垣鶴芝以兵入衛封平<sub>國</sub>值三月鶴芝克海  
口命霖學舞總兵趙牧守之海口失學舞與牧死之鶴  
芝退保火燒輿移鎮沙堤又遣義子林臯隨安昌王恭  
棧再乞師於日本不得要領而還督師劉中藻之復福  
寧也鶴芝以水師助之溫台響應福寧破鶴芝乃與閩  
安伯周瑞屯三盤瑞與鶴芝有隙鶴芝遂依蕩<sub>伯</sub>阮  
進辛卯召守羊瞿等山以糧少爲張名振所阻鶴芝自



是無經畧四方之志矣後不知所終其時武臣得封爵者則有楊耿陳輝涂覺章義郭天才云楊耿閩人鄭芝龍部將唐王時官福建水陸提督魯王監國入閩次長垣耿以兵入衛封同安伯戊子與大學士朱繼祚克興化輝唐王授平南將軍監國進封平南伯覺義皆福寧守將丁亥十月大學士劉中藻克福寧覺與義降監國封覺振威伯義勦武伯命仍守福寧己丑四月福寧破覺與義突圍帥所部而出命其守沙堤閩地盡失護監國入浙駐舟山覺加太子太保覺字登華天才金聲桓部將官副總兵協守福建與巡撫佟養勳有隙遂降監

國封忠勤伯

阮進字大橫閩人嘗爲海中小盜能以少擊衆熟諳水性張名振拔之使領水師營進德名振實甚張國柱之攻舟山也黃斌卿求救於名振名振遣進擊之進率艤艫突入國柱營礮聲雷鎗波濤湧起國柱大敗自斌卿不德名振而反妬名振之有進以計聞之使進叛名振曾王監國入閩次長垣進以兵來會封蕩國伯丁亥名振出師赴吳勝兆之約進以不習三吳水道不從取名振船二十艘軍資器械數萬歸閩海招軍頗盛與鄭彩克復三十餘城己丑六月閩地盡失名振克健跳以書

招進進復與名振合

大兵圍健跳進帥樓船數百至金鼓聲震天地

大兵解去健跳乏食進以百艘泊舟山告糴於斌卿不  
應進遂與名振王朝先等共殺斌卿監國得駐舟山加  
太子少傅辛卯八月名振奉監國親撫吳淞命進守橫  
水洋都督焦文玉武義將軍戴爾惠守螺頭門十七日  
大兵試舟海口進以三舟突出獲樓船一戰艦十執十  
一人而縱之以示勇進詣海門議和

大兵欲執之進以數舟脫歸是日天忽大霧

大兵順風悉抵螺頭門無知者進歸逢將軍金礪之舟

進以火毬投之風轉蓬脚反擊進面創甚遂投水死文  
王爾惠戰死文王嘗爲名振部將監國授副將累遷都  
督僉事前鋒將軍右都督爾惠字少峯薊人從督師鏖  
肅樂起兵監國授錦衣衛經歷擢武義將軍進從子美  
駿辭驊美監國授澄波將軍己丑名振上疏請以美與  
僧湛若齋慈聖太后所賜藏經爲誓乞師於日本監國  
從之親賜宴十一月朔美出普陀十日至五島又三日  
進長崎日本出訊美喻以梵筴乞師日本大喜湛若故  
爲日本所逐湛若欲以梵筴自結於日本日本見湛若  
大駭美知爲其所賣遂載經而歸駿監國授英義將軍

進爵英義伯駿與名振扈監國親搗吳淞未至而舟山破駿乃依鄭成功於海上己未十月駿與總制陳御六圍舟山克之丙申八月舟山再破駿力戰不勝被執忼慷不屈死驊與驊俱授左都督

王祁太倉人嘗爲鄭西王部將魯王監國入閩鄭西王常湖起兵應之破建寧遣祁守之祁出攻邵武祁兵營於山中取民間几案數百張每張懸火線數十炷黑夜順流環城而過

大兵謂祁兵薄城礮石交下遲明方知其僞祁每夜如此

大兵習之不疑一日祁帥兵至遂克之監國授鎮守建寧總兵官加左都督進封鄖國公明年

大兵破建寧祁與常湖巷戰力竭自焚死祁

國朝

賜諡烈愍

王朝先四川土司崇禎時調征塞上累立戰功出徇邊海至奉化四五月而聚兵千人邊海爲之出賦魯王監國駐紹興擢平西將軍命由海道西征朝先擁兵蛟關舟山總兵黃斌卿留之部下不任以事時定西侯張名振亦至朝先與名振善後名振因斌卿之侮而別營於

南田朝先亦失歡於斌卿而別營於鹿頭兩人皆恨斌卿魯王監國次沙堤朝先遣兵入衛與蕩國伯阮進破健跳以駐監國監國封朝先爲平西伯標下諸將呂廷詔張濟明王文龍俱加總兵朝先與名振將脩怨於斌卿也會斌卿之將黃大振善獲番船之資以餽斌卿斌卿不饜大振無以應之逃匿朝先營內駕危言以動朝先朝先遂與名振阮進謀上疏監國以殺斌卿斌卿既殺進收其水師朝先收其陸兵軍資甲仗一不付名振朝先既有斌卿之兵勢甚張而總兵張濟明又從而蠱惑之名振遂與朝先有隙是年鄭彩與鄭成功爭左中

所彩具疏請援名振欲結歡於成功而反擊彩朝先又與名振不合名振益惡其異已也明年名振治兵南田朝先居守舟山不虞名振見襲士卒散遣民舍名振猝至朝先手格殺數十人而死張濟明跳城奪哨船降願充先鋒以報之

黃斌卿字虎癡興化衛人有智術通文墨善談論父爲丞北方斌卿侍行遇流賊父見害斌卿因客浙與妓劉氏狎資用乏絕後以恩例當授把總劉氏罄其裝以助乃得官累升舟山參將而劉氏爲其妻妒死擢江北總兵福王立命協守京口斌卿偵知左良玉難制請改駐



皖池從之又命以原官掛征蠻將軍印鎮守廣西未行  
左夢庚陷建德命斌卿禦之斌卿與夢庚戰於銅陵敗  
之明日復戰獲其船三千艘南都破遁歸唐王立斌卿  
進千金爲助得附勸進上言舟山爲海外巨鎮番舶往  
來饒魚鹽之利西連越郡北窺長江此進取之地也唐  
王善之封肅虜伯賜劍印命屯舟山得便宜行事晉王  
監國之紹興斌卿以兵來會進封侯斌卿至舟山集將  
佐領乃得朱國泰朱壽劉世勲等造戰艦積糗糧整立  
軍營又上疏乞周鶴芝自副爲之延納士人招徠商旅  
思欲爲不侵不叛之島夷耳出師攻崇明戰敗以周瑞

救還丙戌正月朱國泰敗沒於青村六月江上破富平將軍張名振扈監國航海至舟山斌卿不納斌卿之爲人也怯于禦大敵而勇於害同類連殺副使荆本徹忠威伯賀君堯沈兩王子取胡來貢輜重雖與張名振爲親家思并其軍又劫王朝先并使阮進與名振貳於是爲儕輩所深惡己丑健跳乏食阮進告糴于斌卿斌卿不應進與名振朝先其疏請誅斌卿監國從之斌卿遣將陸瑋朱玖出禦數戰輒敗斌卿求救于安昌王恭楨大學士張肯堂上表待罪時陸瑋朱玖出海阮進疑斌卿之逃也縱兵殺之沈之海中臨死見荆本徹立其旁

二女從死于世爵名振壻也留名振軍中斌卿

國朝

賜諡節愍

外史曰勲衛殉國者垂名竹帛真無媿矣其他縱暴無狀者同歸於盡甚矣庸妄之害國以自害也

傳第十一

魯之春秋卷二十三

海鹽李聿求學

武功

蔣若來

張廷綬 李唐禧等

徐啟睿

江漢 劉 穆等

劉世勲 馬 泰等

易重丈人詩稱元老揆文奮武二者兼資浙東督師友  
六家軍雖皆文臣而麾下虎臣輩出莫不謀勇並施奇  
正互用其有死守一方捐軀疆場亦干城之光也作武  
功傳第十一

蔣若來字龍江長洲人有勇力善騎射少與同里故將  
角力故將負奇其勇妻以女入行伍積功至守備崇禎  
九年賊入江北圍廬州陷和州巡撫張國維遣若來守  
江浦陳于王守六合賊方圍江浦若來急入與知縣李  
維樾固守賊登城若來拒卻之縋下角賊矢著其頰左  
臂傷裹血還戰賊乃退六合無城若來與于王犄角捍  
賊二邑賴以全以功擢游擊進參將明年三月賊犯太  
湖國維遣將禦之鄧家厝若來與于王夾擊之賊多死  
夜復至中伏亦敗之乃掘堦守二十四日賊多營數萬  
衆齊至圍數重若來等哭擊數日會天雨甲重不得出

于王死之若來服圍人服以免未幾左良玉等救之若  
來援戰自晡不食徒手搏賊擲賊所乘馬馬骨俱折賊  
走潛山之天王古塞國維檄良玉搜山良玉不應賊復  
出太湖連蕪王勢益熾會總兵年文綬偕劉良佐來救  
與若來大破賊賊始遁入湖廣擢右都督府都督安慶  
總兵官鎮安慶十五年賊陷安慶若來妻戰死中軍尤  
牛中流矢死若來帶罪立功是年秋偕總兵黃得功劉  
良佐復大破賊于潛山復原官賜玉帶仍鎮安慶南都  
破若來與通政侯峒曾起兵嘉定不克走浙東魯王監  
國命與督師朱大典守金華城將破先殺愛妾及子女

卷戰經日力盡自刎死

國朝

賜縊忠烈

張廷綬字雲衢鄞人崇禎末補武學生佐督師錢肅樂起兵以驍勇署總統會師江上魯王監國授都督僉事時吏部右侍郎陳函輝留中調度其兵莫屬函輝謀於肅樂肅樂薦廷綬函輝請於監國以所部授廷綬命鎮台州海門遙受函輝節度已而大將李唐禧至監國命與廷綬共治兵於台唐禧自以初至每事皆咨廷綬而行兩人和衷共濟日練兵士

大兵入白廷綬欲俟函輝消息唐禧曰敵兵已逼不如  
偕我早死徒殺士卒無爲也廷綬曰諾各遣其麾下袍  
笏兀坐營門

大兵過廷綬營諭降不屈殺之唐禧亦被殺廷綬闔門  
從死唐禧金山衛世襲指揮從侯承祖起兵不克入閩  
由閩入浙監國授鎮南將軍鎮守台州紹興破熊師死  
之師監國授總兵守紹興兵敗被執裸縛之師厲聲曰  
勝敗死生兵家之常何辱之有遂行刑其妻例入營其  
妻曰我命婦也豈肯見辱一死爲快亦命斬之行刑者  
惡其不肯下營故以刀虐其私其妻憤極唾其面首纔



斷行刑者碎仆七竅流血死

徐啟睿字聖思鄆人少補諸生任氣罵座有古俠士風  
尤嗜擊劍見時事巨測輒舞劍漫罵一日忽埋佩劍削  
髮爲僧閉關寺中聞京師陷哭七日夜不絕聲旣而曰  
江南半壁猶可望也則又閉關如故踰年聞南都破則  
破關而出掘故所埋劍夾以雙斧著鶡冠衣綠錦衣犬  
聲如雷趨督師錢肅樂營肅樂引見於魯王監國問所  
需對曰臣請布衣居肅樂營入參帷幄出捍軍旅監國  
奇之授錦衣衛指揮不拜自稱白衣參軍督兵江上則  
出入矢石間以先衆時諸營首鼠互相觀望則又漫罵

曰今日焚舟前進或可一逞逍遙坐老以自困乎一日晨起則佩劍集其麾下百夫屠牛饗之諭以大義將出戰肅樂止之曰軍行無後繼何益對曰我將赴敵而死以愧諸營之不進者遂渡江直薄西岸

大兵以爲游騎不以爲意亦遣裨將禦之啟睿則擊劍直入掩殺過半馳馬至江濱呼東岸諸營並濟無應者復反再戰

大兵乃急出銳師援之且戒曰其帥甚銳必生致之於是蜂擁而至長圍四合且戰且擁而啟睿忽陷泥淖中遂被執諭之降則又漫罵

大兵怒剗其腹實以草懸之江門百夫見啟睿死皆鬪死監國聞之震悼今以原官贈都督廕子世襲指揮

江漢字子雲錢唐人膂力雄捷魯王監國時漢詣督師錢肅樂營請自効積功累官都督僉事總兵官肅樂倚之如左右手故軍較盛於諸營及浮海至長垣再出師七閩震動亦漢之力爲多時御史馮京第乞師曰本請漢同行肅樂遣之旣歸曰東師必不出也聞者不信曰他日請驗已而日本果愆約肅樂旣卒漢以有母在鄞歸遂家於鄞辛卯兵部侍郎王翊梟首城西按察司副使陸宇燂思收葬之謀於翊之故卒毛明山明山曰非

得江都督漢事不諧宇燭亟以情告漢曰請以中秋日  
待我城下屆期漢忽紅笠握刀從健兒數十人揚揚而  
出時城禁方嚴漢徑登之守者以爲新將趨叩頭惟謹  
至梟首所問守卒曰孰戴此頭也者卒以刃對漢佯怒  
曰嘻吾怨家也亦有是日乎拔刀擊之繩斷首墮地漢  
遂循視雉堞周行縱覽濠水卒隨之凜凜宇燭明山已  
豫立城下抬首而去漢之應變甚奇其將兵制勝亦多  
如是後窮困無以自給種蔬而卒其時扈從監國入閭  
者有劉穆陳文達沈時嘉米岱瞻王儀鳳金浚諸人云  
穆山陰人崇禎十年武進士第一授副將從督師于潁

起兵擢掛印總兵文達時嘉岱瞻儀鳳浚皆授總兵官  
文達加太子少師

劉世勳字允之上元人崇禎初右科進士歷官都督僉  
事助守舟山累陳雄畧黃斌卿不能用魯王監國駐舟  
山進安洋將軍辛卯七月

大兵分道並進聞報命蕩伯阮進帥師獨當定關定  
西侯張名振督水師總兵張晉爵掛印總兵葉有成馬  
龍左都督阮美阮驊方簡等退南師兵部侍郎張煌言  
督英義將軍阮駿總兵顧忠羅蘊章鮑國成左都督鄭  
麟都督僉事阮驊李英傑符文煥等斷北洋都督僉事

任麟監督留定西侯中軍金允彥巡城主事卽元吉中  
鎮總兵馬泰與世勳守城八月戒嚴名振奉監國親搗  
吳淞以牽制之名振甫去天忽大霧連日二十三日  
大兵乘風徑渡無知者進遇

大兵用火攻而返自燬

大兵遂直抵城下世勳料簡城中步卒五千麾下死士  
五百居民助之乘城而守屢攻屢卻二十六日開門詐  
降內伏大礮受降者爭先入伏發擊傷千人

大兵愈怒急攻然終不克先是元吉允彥約爲

大兵內應顧不得聞二十八日遂縋而出且言世勳嚴

守狀乃益兵九日二日大礮如蝟城雉盡壞城破世勳  
與錦衣衛指揮李向榮副將單雲登杜芳夏霖解龍朱  
起光沈雲曹維周韓紹琦夏時霖張聖治薛之冑任則  
治童自齡巷戰死世勳還署乃朝服北面望海拜自刎  
其從亾海上者水師掛印總兵張晉爵葉有成方簡朱  
鼎臣陸師總兵張子先馬龍顧忠羅蘊章鮑國祥鄭麟  
史文龍王有才馬泰熊夢熙楊復葵李英傑符文煥都  
督僉事方剛厲象乾周鳴鳳周昉趙賢錦衣衛指揮楊  
燦內官陳進忠劉玉張晉李國輔劉文倭云舟山再破  
晉爵乘舟截橫水洋大戰兩日夜力竭自刎死世勳

國朝

賜諡列愍



傳第十二

魯之春秋卷二十四

海鹽李聿求學

列女

元妃陳氏

方氏周氏等

陸氏

張氏沈氏

朱氏

金氏

余考甲申北都之難嘉廟烈廟二后死之其時文武殉難諸家新樂侯劉忠恪眷屬最多而孟忠靖馬文肅劉文正汪文毅陳恭潔介愍金忠潔之家其母若妻若妾若媳皆有死者其家居聞訃自裁則王節愍妻說者

皆以爲中宮陰教之隆致之也然是猶淵盤達葛之所聚舟山海外一島耳辛卯之役元妃陳氏死之其文武殉難諸家亦有若定西侯張名振眷屬最多而大學士張肯堂工部尙書朱永佑文選主事李開國戶部主事林瑛工部主事顧宗堯之家死者不一其家居聞訃自裁則給事中董志寧妻夫執非笄珈大節所感召與抑何其先後相合若符節也降及草野山寨之役烈婦尤多風化之盛未有過於此者其已見於本傳者茲不贅作列女傳第十一

元妃陳氏鄞人曾監國次於會稽張妃主宮政而陳妃

以丙戌春入宮張妃父張國俊頗豫事陳妃嘆曰是何國家是何勲戚而尙欲爾爾而已親族有至者悉遣之監國航海命保定伯毛有倫扈宮眷自蛟關出期會於舟山道逢張國柱亂兵殺掠擁張妃去陳妃在副舟急令舟人鼓櫂突前追不及伏荒島數日飄泊至舟山監國已入閩旁皇無所歸故吏部尙書張肯堂遣人護之得達長垣監國見之流涕進冊元妃辛卯

大兵直抵舟山城下安洋將軍劉世勲議分兵先送宮眷然後一戰元妃諭辭曰將軍意良厚然蠓灘鯨背之間懼爲姦人所賣則張妃之續也願得死此淨土乃止

城破整簪服北向拜謝投井而死義陽王妃杜氏宮嬖  
張氏從焉錦衣衛指揮王朝相與內監劉朝共掌宮政  
見之嘆曰眞國母也豈可使其遺骸爲亂兵所窺相與  
舁巨石填井平之朝相與朝共刎其旁而死乙未英義  
伯阮駿再下舟山訪得陳妃死狀封其井立碑致祭而  
表言於監國加謚貞妃

方氏周氏畢氏姜氏皆大學士張肯堂妾舟山破肯堂  
令家屬先死方氏周氏畢氏俱縊死姜氏投水死畢氏  
先登姜氏止之曰死有序莫匆匆也肯堂曰善乃以序  
而上縊家媳沈氏女孫茂漪俱縊死僕婦諸婢皆從死

國朝俱

賜入節孝祠

陸氏鄞人職方主事華夏妻夏死陸氏親詣市初其首於屍負以歸旣殮絕食其姑勸之乃進餐已而有令徙諸家妻子於燕夏之友高斗魁急過告陸氏曰當自爲計陸氏曰諾嘆曰天乎吾不得終孝養矣視其盂中尙有米親掃曰春之春畢跪於姑前曰婦不死恐終不得事姑姑其強飯自愛以保天年語畢徐起投繯堂中旣上而絕者再鄰婦以楊梅一孟進曰願嘗此而後死曰渴甚啖之盡以巾拭汗復易繯而死

國朝

賜入節孝祠

張氏推官楊文瓚妻沈氏文瓚之兄文琦妻文琦與文瓚先後死張氏負文瓚尸初其首吮其血哭盡哀曰楊郎死忠分也何以哭爲因治棺衾皆兩具召畫師至寫兩影乃書遺戒曰楊郎無愧于天地無愧于國家偷生一載有爲而然妾今從之亦可無愧于楊郎遺有二女楊郎在囚中已擇壻矣乃拜其舅投繯被救不死怒曰將陳我節取楊郎遲我久矣乃飲藥少選壽不卽發復投繯而絕文琦妻沈氏哭曰吾似烈矣吾後之哉或勸

之嘆曰昔陳同甫之傳烈女其姊不屈而死其妹畏死  
卒受辱諸君將陷我爲畏死之妹耶亦自縊死

國朝俱

賜入節孝祠

朱氏鄞人車駕主事屠獻宸妻賢而能文獻宸死海道  
聞華楊之妻皆死遣姥四人主獻宸家防朱氏不得聞  
陽爲歡笑以按之數日防稍懈潛賦絕命詞因謂四人  
曰我將一浴汝儕可暫屏姥聽之闔戶自縊死

國朝

賜入節孝祠

金氏會稽人都督章欽臣妻江上師潰欽臣與金氏入  
傅山結寨金氏善用兵時時勒兵出殺傷甚衆山中人  
呼曰夫人營一日偶逢婢婢逸出告

大兵指其間乘其不備破之欽臣與金氏皆被執問官  
憐欽臣忠欲生之令巽辭求免欽臣亦思留身有爲將  
從之而金氏力爭之遂死金氏例沒入功臣家將發遣  
金氏嬖罵不屈問官始恐之以斬再恐之以磔金氏曰  
死則死耳吾不可辱問官大怒竟磔之而行刑者見其  
美出褻語金氏大罵刑畢而行刑者暴死金氏屢顯異  
邑人立祠祀焉曰大金夫人



跋

是書為 先曾祖五峯公所著 先曾祖一生肆力於經學中年以後涉獵各學富有著述有夏小正註桑志後漢書儒林傳補等書而此書尤為有關一代史乘之宏著開福嘗聞之 先父宣謀公云是書成於道光十三年癸巳不數月 先曾祖即棄世沒之前以稿本授 先大父乾齋公嘆曰書特存其實初完本未盡裁節耳天其假壽一年手後竟不起 先大父命 先叔欽齋公

儼齋公照錄兩套丁酉甲辰 先大父兩次客  
京師得通譜潘吳李三君校讐以艱於貲至  
咸豐七年丁巳始付雕匠九年冬刻將竣僅序  
目表未全詎不久江浙淪陷 先大父以憂憤  
卒迨鹽邑失而復退 先父始於昏夜舫舟入  
城取藁本出途中又遇兵劫白刃相脅遂牽舟  
去倉皇時計若輩此書當無所用追而哀之  
得携歸然已刻二十二卷板未及載出特携其  
抄本一套與樣本一套耳當付刊時序此書者  
有桐鄉馮星實應榴崑山李小萊德儀平湖吳

次平若準張海門金壩蘇州潘惺齋曾瑩校此  
書者有門生同邑吳彥宣廷燮黃韻珊燮清婁  
甥平湖張鹿仙炳堃及姻弟同邑陳笠雨希敬陳  
湘漁作敬族弟李存希承燾皆一時知名之士惜  
經兵燹後五序皆失而不可復得矣今此書承  
張菊生王雲五兩先生許由商務印書館影印  
出版念 先父於白刃中携出之先德遺著保  
存至今而仍得公之於世殆有命也夫

者在民國二十二年十二月曹孫開福沐手謹跋

此書曾由吾鄉張菊生大囑商務印書館付印

傳旌逢倭寇侵華未及出版一九五三年四月蒙  
張菊老將原稿六冊影印樣本一份贈吾鄉厚  
史專家朱希祖先生跋文與校勘記合訂本  
又徐孟之先生校勘記一本一併交付 閻福檢收  
經廿八年戰禍尚能重睹原書如獲至珍欣感  
萬狀當請張菊老將影印本代為捐入合衆圖  
書館以供眾覽茲得張朗之先生之贊同將原  
稿六冊連同朱徐兩公物件一併捐入浙江省  
立圖書館藉備研究歷史者之參考  
記念時在一九五五年一月間福附記

閻福  
有八

魯之春秋跋

魯之春秋二十四卷余鄉先輩李五峯先生

緒海鹽縣志文苑傳云李聿求字五峯諸

事章句閉戶研經親歿布衣終身著夏小正注後漢書

儒林傳補桑志等書行世案縣志簡略先生著述頗

多當時修志第就有刻本行世者載之未盡采訪也

余喜搜羅鄉先輩著述先生之夏小正注四卷後

漢書儒林傳補二卷桑志十卷皆先後購得復得先

生手寫吳門紀遊詩一卷詩稿二卷

其一卷上標絲字蓋以金石絲竹匏土革木記

教原八卷原又有刻本永安湖紀遊詩一卷

與陳敬璋合著秦溪

今存一卷耳

棹歌一卷去年冬又得先生稿本魯之春秋二十四卷添  
注陸氏甚多間有款帖全葉盡行改作者初疑此書  
未有刻本故海內藏書家未見著錄今春謁張菊生  
先生於上海始知李氏裔孫已託商務印書館景  
印此書旋蒙菊生先生將景印稿本寄閱得觀先  
生曾孫新跋謂此書成於道光十二年其年先生卒  
至咸豐七年始付剞劂九年刻成二十二卷惟序目及  
表尚未全刻適丁太平軍役版片全燬僅携得鈔本  
及所刻樣本兩部此書之流傳源流始末昭然矣余  
所得稿本蓋為別一流傳之本足資校正者頗多乃別

作校勘記數十條錄呈菊生先生俾資參攷改正  
自清乾隆禁燬明季史籍以來學者欲撰輯南明史  
者輒歎史料之難得魯監國史事記載雖不乏人  
而流傳極少先生在道光中葉禁網稍疎明季史  
書稍稍出矣故此書記載獨詳意其時得見魯史  
亦必獨多以余所知有仕於魯而作魯史者略分二  
類其一則至今未見傳本者如吳鍾巒之文史  
二十冊黃宗義  
全祖望均李文靖之南疆遺事  
以火確已失傳姑無  
未之見  
論矣他若于顯之今魯史周濟魯之魯春秋任光  
復之魯王紀事張煌言之四明紀事等其存亡未可

知也其二則今已有刻本者如黃宗羲之魯紀年在行朝錄

中查繼佐之魯春秋馮京第之浮海記張煌言之

北征紀略等是也又有明遺民及乾隆嘉慶時所作

魯史亦分二類其一則至今未見傳本者如戴笠之

魯春秋溫審臨之海疆紀略沈自珽之江東閩位記

無名氏之魯乘等其存亡未可知也其二則今已有

刻本鈔本者如徐芳烈之浙東紀略汪光復之航解

遺聞公羽洲老民之海東逸史以上三種有刻本丁業之蠶壁

錄四卷有鈔本等是也近人所著晚明史籍考關於魯監國者

余有此書史籍考誤以為記魯之君臣事而不知此實記崇禎間事也又如阮星錫之海上見聞錄刻於痛史中此乃記



鄭成功事而史籍考誤置於魚目豎  
國史中諸如此類尚多茲皆不取

凡此諸書先生得見

與否其書中並未明言蓋其所作表傳皆未注明所  
據之書觀其凡例及自序僅引黃宗羲行朝錄及  
續明季遺聞靖海志湯芬行述與夫勝朝殉節諸  
臣錄而已集則以黃宗羲李邦嗣全祖望三家為  
準又有沈文光詩集吳忠烈文集而嘯臺集詩諸  
傳則嗤為妄說不引其餘則僅云博綜諸志傳又云  
諸家文集中所撰志傳而已故其史料根柢皆不能  
明無以測其所見魯史之多寡也又先生山書專記  
諸臣事蹟不載其著作雖如黃宗羲顧炎武等

專以著述見長亦不載其一書即有闕乎當時之史  
如黃氏之行朝錄顧氏之聖安本紀亦不列於傳中  
以故于顯查繼佐任光復馮京第張煌言等所  
記魯史傳中既不著錄則先生得知得見與否  
更不能測而知之然以先生此書記述之詳贍則  
其所見魯史舊文必多於余今日之所見可斷言也  
余舊日所見魯監國史以前洲老民海東逸史十八  
卷為最詳列傳之人甚多然以先生此書考之則  
逸史所有者此書大抵皆有惟各傳互有詳略異  
同可補此書者尚多且此書載魯監國妃僅陳氏

一人逸史則元妃張氏陳氏並載又有烈妃義妃

諸臣傳則有趙毅楊鼎臣顧玠趙天生周西朱

錫麟陳瑞芝周容沈崇埭周齊曾朱憲京徐桐

等十二人此書未有也其次則卻廷采東南紀事十二

卷魯占魯監國之臣有即一梓俞國望陳天樞王

壽長章欽鄰倪辭年沈之泰趙天麟羅瑞葉

振名等十人此書亦未有也上列此二書皆在康熙時作

兩相對照知先生皆未之見然先生此書列傳較

彼二書更多數十人則此書在今日諸魯史中謂為

最詳之作實非後漢先生文筆簡雅考核精確

叙記有法體裁合度雖序論間有雜詞賦之華辭  
立表不附監國之紀年不無可議然此書在今日諸  
魯史中謂為最佳之作亦非諛辭此余所以樂為  
之校讀而不厭也

中華民國二十三年八月十二日邑後學朱希祖謹書

魯之春秋校勘記

朱希祖

目錄

傳第六 方景召

稿本作方召表亦作方召景字衍

傳第八 杜學坤

稿本作學伸表亦作學伸坤字誤

又 江中汜

稿本作中汜案詩江有汜則作汜是汜字誤

傳第十一 朱光起

稿本作起光

表上

上層 二年十月 敵兵遁去

稿本刪去字

上層 三年正月 原校云三上有丙戌二字

案之二年上無干支此獨添干支非下同

上層 三年七月 原校云武紀云從此空無疑

案此八字宜去

又 原校云七月克衢州

補入  
上層

案下層衢州破在八月下原稿本七月下無破

衢州三字是也

表下

下層 阮進為蕩湖伯

湖本應作胡凡本書胡字皆避作湖或作吳  
宜一律改作湖以免參差

下層 六年六月 定西侯張名振克海寧之健跳  
所

稿本海寧作寧海案海寧二字倒誤倒

下層 八年七月 參將蔣士銓

稿本作參軍

下層 八年九月 中書舍人張瑞

稿本作張端

上層 康熙三年七月 扮成僧名

名當作民

卷四

熊江霖傳 嘗恐違諫之罷己 原校嘗作常

案常明避諱作嘗不必改

又 簡討崔相 原校簡作檢

案檢明避諱作簡不必改

卷七



方逢年傳 約均高皇帝子孫

稿本作約均屬高皇帝子孫案約字疑爲均字之誤而衍屬字應補

又 仙霞嶺豈一丸不可封哉

案不字疑衍

陳盟傳 給事中陳子龍李清文章力辨

稿本辨作諫是

又 熊汝霖請援平口伯陳禹良

稿作平胡伯原校改吳非宜作湖

馬思理傳 丁亥正月熊汝霖入十月思理入明年

五月錢肅樂入又明年丑己思理肅樂卒

案錢肅樂傳二月進東閣大學士原校改丑為二

是也又錢肅樂傳記其卒於己丑之前表載

戊子順治五年六月錢肅樂卒十月馬思理卒則又

明年思理肅樂卒當改為其年肅樂思理卒

劉沂春傳與尚書徐石麟定飲事中姜塚罪

稿本麟作麒是

張肯堂傳芝龍意願猶豫而以其弟鴻達所近

勉就約

案近字當為迎字之誤

卷八

余煌傳 具死難者惟煌與劉理須劉同升三人

稿本須作順是

陳函輝傳 古衲共參文物

稿本文作文

王思任傳 故巡撫應天右僉都御史祁彪佳諡忠

敏

稿本彪佳下有贈右都御史五字應補

又

少詹事侍讀學士徐沂

稿本侍讀上有兼字應補

又

故通政司使侯峒曾

稿本故下有左字政下無司字

吳鍾璽傳 文臣則自稱御史侍郎

稿本御史上有都字

李向中傳 是何節度者也

稿本節度下有使字應補

卷十

黃宗義傳 具乃心王室亦莫加翊

稿本加作如案上言莫如王翊故此言亦莫如

翊作加非

姜埰傳 為保定參政錢天賜

稿本賜作錫是

又

仍繫刑部獄

稿本刑作刑是

卷十一

陳士京傳 左都御史章朝薦

案章當作章南疆逸史等書言鄭成功最致  
敬者皆作章朝薦當改正

沈文光傳 颶風太作

稿本太作大是

徐孚遠傳 頽眉抱劍哭園出

哭稿本作哭是

卷十二

吳易傳 晉者併焉

稿本者作卒是

又

紙穀贖緩

吳長興伯集緩作緩當據改

卷十五

王正中傳 時渚將張國柱田仰荆本徹各帥兵先

後過姚江舳艫蔽空畏正中令以敵不敢

犯其地國柱劫定海

案時諸將張國柱至不敢犯其地數句係後人所加改原稿僅云張國柱劫定海王鳴謙縱兵大掠餘姚正中摘止國柱終不得志而去當改正

卷十六

陸宇燦傳 曰吾漢人也

稿本曰字上有其人二字應補

卷十八

王翊傳 至於小寨支軍以數百

稿本作以百數是

卷二十

李文鱣傳 鄞人

稿本鄞下有縣字應補

陸以付傳 鄞人

稿本鄞下有縣字應補

查繼祖<sup>休</sup>傳 後乞師授浙西命從汝霖出師

稿本授作援此誤

卷二十一

王之仁傳 乘之發礮無不靡碎

案靡當作糜



卷二十二

鄭彩傳 官總兵官

校本誤第二官字作友

卷二十三

張廷綬傳 鄞人

稿本鄞下有縣字應補

徐啟睿傳 鄞人

稿本鄞下有縣字應補

卷二十四

元妃陳氏傳 鄞人

稿本鄞下有縣字應補

陸氏傳 鄞人

稿本鄞下有縣字應補

朱氏傳 鄞人

稿本鄞下有縣字應補

希祖案原刻樣本表上朱墨筆校補之處甚多  
皆非五峯先生原本蓋潘吳李三先生所校  
補細按之大半皆弘光隆武永曆三帝之事不  
應入於魯表頗乖五峯先生謹以敵之體例謂

宜一概不必補入即間有魯事然原本既無後人  
亦不必竄改致失真相校讀既竟附識於此八  
月十六日

